

江寧府志

二十一

漢書門			
二	三	九	八
九	一	八	號
四	八	冊	架

內閣文庫			
三	三	九	八
九	一	八	號
四	八	冊	架

內閣文庫	
番號	漢 2398
冊數	48 (34)
函號	292 14



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



江寧府志卷之二十四

人物傳五 孝義

大學東
校典藉
局之印

淺草文庫

天生蒸民有物有則孝首百行義崇五德其維哲人躬行有得金石可渝流芳靡忒作孝義傳

南北朝

陶子鏘字海育秣陵人兄尚宋末為倖臣所怨被繫子

鏘公私緣訴流血稽顙兄乃得釋母終居喪盡禮與

范雲鄰雲每聞其哭聲必動容改色欲為申薦初子

鏘母嗜葷母歿後常以供奠後忽營葷不得子鏘悲

恨慟哭而絕火之乃甦遂長斷葷味

徐雄丹陽人文伯子位奉朝請能清言多爲貴游所善
事母孝母終毀瘠幾至自滅俄而兄亡扶杖臨喪一
慟而絕

庾沙彌其先穎上人居金陵嫡母劉氏寢疾沙彌晨昏
侍側母亡晝夜號慟鄰人不忍聞旣葬旅松百餘株
自生墳側梁武時以純孝舉召見嘉之補歛令復丁
生母憂喪還濟江中流遇風舫將覆沙彌抱柩號哭
俄而風靜蓋孝感所致

劉訐字彥文其先平原人居金陵幼稱純孝數歲父母
繼卒訐居喪哭泣孺慕幾至滅性赴吊者莫不傷焉
與族兄歆聽講于鍾山諸寺因共卜築宋熙寺東澗
江絲字含潔先考城人居金陵父患目絲侍疾晷月衣
不解帶夜夢一僧告以飲慧眼水乃可差及覺說之
莫能解者乃詣草堂寺訪智者法師啓捨牛屯里舍
爲寺以慧眼爲名及就創造泄故井井水清冽異常
取以洗眼因此遂差時人謂之孝感梁南康王召爲
主簿不樂仕進父卒廬墓終日號慟月餘卒

謝貞字元正晉太保安九世孫幼聰敏有至性母王氏
授以孝經論語讀便成誦年十三通五經大旨善左
氏傳祖母阮氏病風眩每發輒不能食貞亦不食往

往如是丁父艱號頓于地而復甦初父藺居母喪不食泣血而卒家人懼貞復然請長爪禪師為說法師謂貞曰孝子既無兄弟極須自愛若憂毀滅性誰養母耶自是少進粥糜母喪哀毀羸瘠時徐祚沈客卿俱來候貞見其骨立纔加寬諭貞更感慟氣絕良久二人相顧嘆曰信哉孝門有孝子士大夫無不仰止貞竟以毀卒

張松建康人兄悌坐罪當死松及弟景各欲代死縣以讞上梁武以為孝義特降其死

宋

包級父鑲為人所殺級年十七與弟綉相抱痛哭抉仇雙目瀝血祭父仇家訟于官壯其孝義為直焉

秦熹者其先自南泉徙居秣陵為人長者歲收租萬斛鄉民輸粟每令自行概量間捐之鄉人德焉當熙寧元豐間頻歲饒饒作糜粥以飼往來之人計升斗以給乏絕之家全活甚眾有司聞而薦之不起

李華字君儀溧陽人父歿居喪毀瘠盡哀母老得癘疾華憂懼置家事不問專奉養衣不解帶者十餘年尤篤友愛內外無間言有田十餘頃歲水旱誓不一言減縣官租穀翔踊亟發廩平價食其一方虛甑待炊



者日以千計大觀間蝗數害稼獨至其田輒不食人
以爲異年八十六卒子朝正紹興中知溧水有異政
葉夢得薦于朝召對賜五品服乞易所得章服封母
從之

錢戩溧陽人居父憂有少年來曰而父在京逋我金戩
欲償之弟有難色令舉其驗戩曰大人與人交信彼
必不我欺且父貸宿鏹拒無左驗詞雖直非孝子待
親之道卒與之雖家瘠不悔元夕家人出觀燈鄰人
潛入爲盜戩覺之呼前諭曰爾良家何乃至是取金
與之使去竟不語子時敏字端修登政和第擢大理
寺丞累官敷文閣待制

楊俊字質英溧陽人性至孝父卒居喪盡哀廬墓三年
理宗時登第勅令掌翰林院

呂宣問開封人文穆公蒙正四世孫徙居溧陽父倅洋
州娶韓氏生宣問甫六歲辭去莫知所之父卒事嫡
母李氏甚孝將訪所生以池陽當蜀人往來孔道乃
求調錄事叅軍凡蜀客經從多方物色知在仙井被
檄如荆門過當陽玉泉寺求夢于武安王而應果得
其母于仙井相失四十餘年一旦復見相持悲泣吏
卒爲之出涕時韓已七十嫡母八十三矣

嚴晃字昇之溧水人精于周禮中武進士以孝聞元兵渡江負母避難粹與兵遇兵欲刃其母晃以身蔽之中頭幾死年七十八卒

元

樊淵字浩翁句容人事母孝至元中奉母避兵茅山兵至欲殺其母淵抱母號哭以身代死兵兩釋之母亡事之如生薦辟不忍去墳墓終不起

王榮句容人五世同居長幼和睦庭無間言歲饑輒出粟以賑鄉里賴以存活者百餘戶捨棺殯殮八十餘人年八十三卒延祐間旌其門

王進德字仁甫其先自汴來家金陵勤苦生殖家道以興進德事兄如父好施濟無所吝其最著者郡庠燬進德構講堂極宏敞并陳設器具所費七萬餘緡買宅一區割田九百畝創建江東書院朝錫以額設官掌其教置義莊以贍親族修城隍以扞井里遇父母忌日修時祀致終身之哀謙和惇厚未嘗以貲富齒長而傲貧賤炎天獨處必正衣冠見者肅然年八十四卒從子子清字寅叔事母盡孝人無間言富厚不逮進德而樂施好義惟力是視人以為難

明

周琬江寧人父爲滁州知州以侵官路論死琬年十六叩闕請代父刑上疑爲人所教命斬之琬顏色自若乃宥其父死戍邊琬復請曰戍與斬均死耳父死臣安用生爲願早就戮上怒命縛至市琬色甚喜上察其誠赦之親署屏曰孝子周琬尋授兵科給事中

李疑世居通濟門外家貧好周人急授童子經得粟自給不足則以六物推人休咎金華范景瀉爲部吏隻身得疾無肯僦舍者杖而詣疑告曰不幸被疾人莫我容聞君義甚高願假榻疑延入汎室居之躬爲煉藥煮糜旦夕問所苦旣而溲矢床席穢不可近疑曰

爲浣滌不怠瀉涕曰累君矣恐不復生無以報德囊有黃白金四十餘兩在故旅邸願自取之疑辭不受瀉曰君不取亦爲他人得耳何益疑遂同其里人偕往携歸記其數而封識之瀉死疑出已財殯于聚寶山舉所封囊寄其里人家招其二子至按籍而還仍贖之以歸平陽耿子廉械逮京師其妻孕將育衆拒不納臥草中以號疑歸謂婦曰人孰無緩急倘爲風露所襲則母子俱殞吾寧舍之而受禍俾婦邀歸產一男踰月辭去不取其報金華宋學士爲之傳

孝義王指揮失其名世襲虎賁衛妻死不娶獨與母居

孝養備至人皆稱爲孝義王蓋重之也同官黃某遠
謫久不通問妻貧不能存成國朱公儀素愛指揮閔
其喪偶欲以黃婦妻之召指揮語之故指揮不敢拒
唯唯而已成國遂擇日歸之指揮雖處一室夜則各
寢居數月成國聞之召訊其故指揮曰曩以主命不
敢逆但與婦同寢其夫歸何以處之況彼失節是某
失節也成國曰若爾則如之何指揮曰如兩全不若
遣送謫所某家有老奴夫婦二人令伴送至彼可無
虞矣成國嘆賞久之亦賜金遣二人送至謫所夫婦
重聚四方聞其事者皆稱之

徐昱字彥昭江寧人敏悟讀書數行俱下通五經以易
舉宣德七年鄉試遷國子學助教昱天性孝友父病
革醫告技殫昱旦夕籲天求以身代刲臂肉和糜以
進父疾瘳鄉人將以聞部使者昱曰此一時遑迫計
無復之耳奈何從邑長令干名乎居官有矩範爲大
學士劉定之祭酒吳節所推許子完另有傳
董宣字繼善以貢授青田訓導修明職業迎母官所晨
起課諸生畢卽候于寢門承顏盡歡母病號泣嘗藥
母卒摧隕復甦者數次郡守以下憫之資其歸葬著
有青田雜錄

徐遠字文穆上元人平生以古人爲法有友人寄一竹篋內藏白金奇玩其夜遠家失火友人已甘灰燼往探之遠于已物無所取獨抱此篋移置善地性耽書史所著有居學齋集

王昌江寧人爲人端慤誠孝事親色愛靡間母殷患頭風仆地傷且死昌顙天求以身代叩頭流血血泫泫濕衣裾間母疾尋愈昌之子頊善繼克孝母得奇疾焚香禱神割股進母疾頓解人以世德稱之

金玉留守右衛人弱冠爲父報仇郎中尹灝稱其孝蕭春字秉常其先江夏人寓居金陵性至孝父病徇春不解帶者逾月每夕沐浴仰叩北辰及病劇臭穢狼籍春泣曰吾父不復生矣兩手據床一吸殆盡悲苦遂絕良久乃甦父卒哀毀幾不欲生廬墓期年

李曉字子晦江寧人以資游成均授岷縣丞當督輸却例金不取進瀋陽衛經歷曉事親孝母病侍湯藥不懈生平赴義好拯人于急師蔣某旅卒家貧曉經紀逆其喪歸葬之遊太學同舍姚生遺其袖中金爲曉所得候其人歸焉里中稱爲鶴山先生著有賓柳亭稿

徐震字廷威其先吳郡人家金陵性篤孝友十三而入

部庠七舉不第遂謝去博士業講究身心之旨以節行自高錦衣指揮呂貴常以金十二斤密托震遺少子貴死召其子還之其子啓封顧疑震震召故人并其子出貴手書示之其子乃愧謝而去博士沈立者善數學推其子後當貧以五十金託震震後訪其子果貧亦召而與之其不侵然諾如此成化間被薦至京例當得官不就隱居來鳳山

姚讓字文敏上元人家世富饒讓勤儉樂施凡貧不能殯斂及流離無依者叩門告之無不立應未嘗有難色橋梁道路廢圯者卽爲修葺街巷無井者輒上開浚景泰間南雍志成出工價梓之至于自奉儉約如寒士子弟服用及家人婚喪皆有常經未嘗妄費晚益礪儒術人傳頌之

龐景華字宇春上元人幼有至性父歿時方九齡卽哀毀如成人母孀居鬻簪珥市書遣就里塾景華承母志力學不息比長娶婦徐氏能順姑志勤織紉家因以饒孝養備至母病沾危景華割股爲糜以進疾乃瘳常至江滸捐金拯溺活十六人鄰火爇近所居籲天而禱風反火息有司奏旌其門曰孝行復其家母九十三乃卒廬墓側朝夕哭有盜十餘人事椎埋聞

江寧府志 卷二十四 九
哭聲曰此孝子也相戒無犯卒時取紙筆述身後事
遺諸子倪文僖誌其墓

姚珉字廷器江寧人篤志孝友父嘗客遊于浙得疾劇
珉兼程往侍湯藥未浹旬病愈人謂孝誠所感弟玘
爲教官致仕而貧珉資給之終身妹歿以二甥爲託
撫教迄于成立親舊有婚喪不能舉者借貸無吝色
吳瑄字元玉上元人天性至孝親病躬侍湯藥及卒哀
毀踰禮墓側產芝登成化己丑進士歷陞工部郎中
有吏犯罪當革役欲鬻子贖罪瑄愍而復之其德惠
及人類如此

李景星字應德上元人爲諸生篤志經訓修孝弟之行
二親喪三日不能飲食葬祭悉用朱氏禮友于二兄
生極孔懷之愛歿能字其孤與人交能急人之難不
計小怨閭里稱其篤行貢人太學卒

何岳字畏齋留守衛籍嘗夜行拾遺金二百鏰不與家
人言凌晨携至故處有尋至者問其數目封識皆合
遂以還之其人欲分數金爲謝岳曰拾金而不敢隱
豈利數金者乎其人感謝而去又嘗授經宦室值主
人以事入都寄一箱于岳中有數百金曰俟遣人來
取去數年絕不通聞適其姪以他事至因託之寄還

岳卽觀察何汝健之曾祖

丁塘其先江都人祖瑄天順初爲錦衣帥歿而賜葬江寧石子岡塘襲府軍後衛指揮使性至孝年五十猶無嗣息人有勸其禱祀者塘曰人受命于天而得生于祖與其乞靈土木曷若乞靈于吾親乎歲時臘臘必走賜坐下具牲牲申誠悃雖風雨寒暑未嘗愆期一日冒雪而往拜謁竟瞻視隴上故有槭樹方隆冬見碩果一如拳異而携歸與室人啖之遂有娠生子弘潮得世襲迄今子姓蕃衍

高仲光豹韜衛世職大司馬遺賫疏入都行至山東投旅邸得遺金一囊約三百餘金因解鞍秣馬以待至次日客始尋至且泣且訴仲光取付之各問姓名而別先是仲光踰四十無子嗣後生四子長名居仁中萬曆辛丑武進士

陳名謨弟名世上元人父病危篤藥餌無効各籲天願以身代乃相繼割股以進而父愈先是其母朱氏曾割股愈其父姊適劉又割股愈母一門之內母姊兄弟孝行相承人以爲難

鄺典前京兆鄺公埜之裔也家金陵爲府學諸生齒且宿矣訓童子于大中橋尹氏夜卧館中羣盜猝至斧

主人門不得開粹典令呼以入典不可盜以刃迫之典大言曰吾受主人請訓若子乃爲若輩啓門以刼之此豈復有人理耶口不可開也盜不得志掠生衣被而縛之逮明主人出乃解其縛人爭重之

楊朝宗字見卿性狷介非義不取嘗館于大姓徐氏有同門生易某相友善貧無以自存將投故知于汴朝宗曰道路遠人心叵測適有館穀之便可少留乎易喜過望時徐姻有杜兵部者將令其子從朝宗學朝宗遂以讓易而易更欲得朝宗之館陰謀奪之聞者咸不直易奮臂來告朝宗笑曰故人情厚寧有是耶明日遂託故辭徐而舉易自代人以是咸多朝宗而惡易會正德間修郡志將列其事朝宗亟止之曰揚友之過以成已名君子弗取也况彼爲貧累耳亦何過哉人以是愈多朝宗爲不可及

趙善繼上元庠生倜儻負氣重義直言嘉靖末年坊甲苦役傾家殞命者相繼有司寘若罔聞善繼日夜謀與同里救父兄門庭之難奔走陳訴已而疾苦漸達于諸要路會郭給事具奏得請下所司悉爲蠲除民獲更甦事詳祠祀志中卒之日異姓來哭者數百人從祀惠澤祠

卜璠字樸菴江寧人生而慈仁濟人之急行年五十卽
不關家務日以施藥掩骸放生修路爲事嘗卜地牛
首山側中途見負戴者苦暍卽以其資穿井井在鐵
心橋至今行旅便之邢太史一鳳爲文紀其事偶過
一橋聞下有哭聲甚哀問之則夫婦逼于債携幼子
欲自盡也急捐金救之次年冬返吳江夜深舟覆攀
船底飄數十里得登岸至一人家叩門求濟門啓則
昔之橋下人也夫婦拜呼爲具食燎衣易舟以行居
恒教子孫以忠孝寬仁每取古人嘉言善行書于冊
以誨之子鏜孫履吉皆掇巍科益淳淳以驕矜爲誠
報若利物爲勉壽八十有七自知逝期沐浴端坐呼
家人拜別令念佛助行而逝身不少欬三日就殮面
光如鏡

姚澗字元白上元人弱冠入太學力學嗜古遊情翰墨
居秦淮上關市隱園與名勝賞咏其中天性至孝母
病脾醫不能療乃割股作羹以進自是病漸愈更壽
而康嘗拾遺金一囊候其主不至盡出以周貧乏謁
選授鴻臚告改南謝去不交當世尋幽賦詩瀟灑自
得子之喬字元胤文雅稱世美云

史世揆字度予江寧人父歿時甫七齡哀毀如成人長

樂施予同里周姓貸其父千金貧不能償析產時世
揆焚其券嘗納妾入門悲痛不已詰其故曰父負冤
繫獄鬻妾贖罪思母無所倚耳揆惻然遣還不問其
資更贈五十金時坊廂苦役每至破家海忠介公已
行釐革而尚有未盡揆倡議條陳大京兆汪公爲請
于朝民困以甦又念衛家領船之累密訪其弊達于
駕部力陳因革而船政以清仕至上林苑監年六十
七偶示疾自擇化期如言而逝

趙時振字少東江寧人事父母曲盡子道舉戊子鄉試
授嘉祥教諭父早卒母八十無疾而終時振哀毀

甚嘔血數升扶柩葬於康家山廬墓三年夜深
微曉不休竟以成疾死朱太史之蕃姚鴻臚澗各爲
詩文哭之後人立碣山中曰趙少東先生廬墓處

武曷號橙墩溧水人家金陵富而好學能仗義有族人
負一王孫千金王孫禁之別室而邀曷飲佯令僕洩
其語曷投袂起曰族人被禁索逋而曷高坐歡飲豈
有人理乎卽代償亦易易耳何見辱之深也乃縱其
族人去歸謀諸婦盡假其簪珥之屬以與王孫曰此
可值八百金餘續完納聞者義之曷有妾蘇氏善持
家嘗宴客失金杯一隻諸僕驚索蘇氏曰無容覓已

收入矣客去謂曷曰杯實亾去然公平日好客任俠豈可以一杯之故而令座客不歡乎曷善其言

魏之璜字考叔上元人少孤貧傭書遂通曉詩文以書畫知名天性孝友養老親撫諸弟皆取給于十指不肯干人杜門匿影日事盤礴公卿過訪不一報謝慕其高曠者設醴折節以冀其一至清言獻酌坐無考叔不樂也以老壽終

徐鯨字樂野本上海人好施予嘗獨修方正學祠墓及安德門至新亭岡大道捐資募工便于行旅孫行字昭卿事親孝與友信終身不二色著述兼通下六壬之術晚年婚嫁畢家漸落徜徉里社安之若素云

翟翬字去文京衛人幼負雋才庠序日爲白眉父時舉仕至叅戎翬賦性冷峭不妄言笑羣居燕集衆喙爭鳴翬獨默然時然後語痛闖禍棄妻子與同志王生繼日入深山坎壈以死王生授室未久委妻子行人尤矜其志云

王馮字杲青四川學憲芝瑞公子至性過人豪爽有大節芝瑞死王事藁葬端州西郊之梅菴馮家赤貧徒跣奔迎經營踰年間關萬里奉柩以歸時六合潘公

江寧府志 卷二十四
士奇與芝瑞同官同志同患難同葬梅菴馮載與俱
歸方起櫬時見菴側更有兩棺暴牆隅詢之菴僧曰
此故廣東直指顧公之俊及其父棺也之俊與芝瑞
爲患難交瑞歿時之俊爲經紀其喪馮嘗從旅壁讀
之俊文心儀之至是悲感不勝乃葬之俊父于已父
壙葬之俊于潘公壙各碣其墓而表誌之

鄧良材字干霄年十八始授經卽能通大義讀書過目
不忘尤潛心于象山陽明之學目無忤視動必以禮
嚴于辭受非義之交介然弗屑也爲諸生留心世務
以節義自許甲申之變號慟累日棄舉子業絕意進

取葛巾野服頽然自放于山水之間子士傑登辛丑
進士同時周掌文字澤宮家貧有志操耿介不屑干
人篤師友之誼書法精楷工小篆授徒家巷晚歲屏
居冶城黃冠野服手鐮小章佩以明志年七十餘卒
王承芳字元美先世歛人幼事制舉業遊學白門從外
父賈遂家焉以歲時洗腆屬兩弟繪同心圖各持其
一志旣翁云性孝友任俠官有採辦不肯賄卸以身
任之族有死喪時其多寡而周卹之故人有溺死者
歲時呼而奠之里人呼爲忠恕翁癸未拜光祿丞不
仕甲申舉鄉飲壬寅從祀鄉賢教子仕雲成進士歷


官著能聲當理閩時以平反大案并被逮親友咸懼
怡然無怨曰某公名臣吾子執法終無死理未幾

恩釋復官人服其遠識云

陳敦化秣陵橫山鄉人父早亡母業氏長齋奉佛撫敦
化及弟妹成立年八十有三忽臥病值土寇所在為
虐或勸敦化遷避敦化曰母病方劇勢不能移若棄
母自全如人理何執不去亡何寇劈門入執敦化索
賄不得繫于樹射七矢乃釋而去後來者踵至備受
塗毒惟以身蔽母復被刃者三寇去箭孔刀瘡流血
如注人皆危之不二十日遂得痊可咸謂孝感所致

云

韓范字孟小鷹揚衛籍早慧伯銀臺公國藩每器愛之
父國楨殉勵志食貧娶薛氏善操作得母歡心崇禎
丙子舉于鄉先是范父任俠好施涉江有負官錢鬻
其女者解橐中金贖歸之咸以為天道云榜發稱賀
范泫然泣曰吾慟吾父之不及見也為輟七筯累日
母蕭氏六十壽親友稱慶范猶以不逮事父為恨母
卒哀痛踰禮服闋謁選得吳興教諭聞國變告先師
廟痛哭挈妻孥歸憂憤成疾瀕死猶具衣冠舟中北
面再拜而逝



吳可箕上元太學生甲申國變可箕具酒食召親友言別衆莫測其意已乃製白衣題詩于襟入英靈坊關廟闔殿扉自縊而死同時有孝陵衛董啓明者聞變自縊樹下妻王氏與子女俱死武舉黃士彩素行佻達頗不爲鄉里所重至是亦題門自經死

庠生趙拱辰江寧人世居西華門三條巷純孝性成居家教授承歡備至有重幣聘之遠遊者拱辰曰吾方以身事親豈以千金易一日耶祝給諫世祿嘗稱爲世之真儒家之孝子子自明孫司至皆以孝稱鄉先達表其里曰仁孝里

張之斗號希垣世職千戶中萬曆己未武進士累官浙江總兵闖賊陷京師之斗歸隱君山不復粒食日採野菜啖之間進酒果而已如是十六年子迎歸卒于家

周禧句容人天性孝友無子或勸納妾禧曰吾兄有子何用妾爲天順壬午自汴還有溺人觸舟傍急援入舟中灌以米飲乃甦詢知爲漁父遂返棹數十里訪還其家嘗寓京邸拾遺金十斤翌日其人泣至尋覓禧審實還之毫不受謝又嘗商閩有誤與貨價十金者禧追還之行事率類此禧卒妻劉氏守節

唐保八句容人幼喪母力穡以養繼母朱氏得父歡父歿奉繼母益盡孝嘗值歲荒保八負米供母而與妻子啖草實有子方二歲朱氏減食哺之保八慮不能兼濟棄子池中妻救之得存後因鋤地得窖錢二斗舉家賴以存活時人以比郭巨云

錢浩翁句容人幼孤能養母有妹失于亂軍母痛念不置浩翁遍訪得諸萊州明年來歸時母年八十有三見之大喜鄰里稱慶又十年母歿浩翁年已七十終喪不脫衰經不御酒肉

錢賓國字寅劬溧陽人伯兄以逋賦繫將質已產代償之令聞而問曰汝寒士曾與而兄析筋否曰析久矣然逋賦者賓國之兄負逋賦名賓國之父也賓國敢死父令負此名哉令義之曰而兄逋以百計爾償其半我爲子足勿過累子後由貢司鐸宣城子允燾郡諸生克承先志所受產爲其弟費盡不問人謂不替父風云

繆希亮字思忠溧陽人事母至孝不樂仕進嘉靖己丑旣中式不廷對而歸遂終養焉母歿不復出司空劉麟表其墓曰有明第一高士

周什一溧水人少孤貧父早卒事母朱氏至孝母病思

魚鱠值大風無漁者什一徧走湖濱得一魚倍價市
歸剖之得黃金百兩以是起家得盡養志

梅洪溧水人少孤失學而所行有儒者風尤以孝著事
母以甘旨自奉甚約其婦弗樂也有後言洪覺而遣
之母瞽洪每負以行一日復明人以爲異母卒廬墓
三年縣令聞而賢之爲娶妻生子矣婦厭其貧去之
數歲子卒洪亦卒邑人收葬于城北十里許有監司
題曰孝子梅洪之墓

花犇孝子高淳人不知姓名日負薪以市嘗雪中至學
宮教諭于鳳見其衣敝肘露謂曰何不以市薪所得
易衣對曰小人有母不暇自謀耳鳳曰汝有妻乎曰
有何以衣妻曰新者奉母而易其舊者聊蔽體耳鳳
喜其孝以千錢贈之却不受固與之乃曰當爲公供
薪鳳堅辭之則夜載而投學舍之園中鳳踪跡其人
竟不得或曰居花犇故名

谷蒞高淳人善事父母中年患瘋痺慮貽親憂詭言已
愈母卒悲甚已而疾漸痊色澤如故人謂孝感所致
兩事繼母如母父卒致哀道路皆爲感動迎養寡姊
終其身爲貧姪娶婦種種善行年七十五卒

楊師祿高淳人年二十四遇亂兵父正宗被執師祿號

泣求代兵異之欲留置軍中師祿不從被害妻卞氏年二十痛夫念親守遺腹子以終

庠生張正毓高淳人善屬文至性天植事親悉準禮經父毀水漿不入口者七日哀毀骨立嘔血而卒

吳翥南高淳人崇禎末隨父避亂會土賊入門劈父胸翥南從樓上望見急下求代被害妻孫氏誓死守節刲股救姑

秦漢高淳人性倜儻不羈弱冠客都門所交多豪俠士嘉靖中諸宦者奉睿皇后梓宮往承天所過郡邑皆有獻至南都淳令陶某獨無衆校擁陶去拘一室必莫敢救漢曰吾當立返之乃衣錦衣乘馬揚鞭而進衆駭視無敢呵止闢戶出陶負以上馬絕塵而去復代陶携金致之得無患一時名重京師年老居家值歲飢漢爲縣令籌畫勸借得穀二千石民賴以生吳正二高淳人讀書尚義不干仕進家無餘產會兄正一以虧糧出亾波及之毅然代輸令義之寬限待完屬自解旅次拾遺金百兩止不行俟遺者至笑舉還之不受其謝

劉銓江浦人永樂中父劉觀爲御史緣事犯辟銓具本擊登聞鼓願以身代蒙特宥復觀原職

江寧府志 卷二十四
陳標江浦人陳澤之子澤妻李氏生標甫五歲而父遣
之改適于浙標既長欲往尋覓以父年衰而止父歿
詣浙迎母亾已十餘年遍訪遺塚啓棺滴血負柩歸
葬

曹鎮六合人鄰人失火及門鎮護父柩不出未幾風反
火滅

季胤光隨父避寇江南孝養備至父卒扶櫬歸躬營墓
域不肯假手于人服闋不脫衰絰積痛不起將革命
繪父母小像以殉

蔣凡者順德府別駕張慙僕也慙以蔭子居官勤慎爲
當路所簡用偶馬蹶而墜亟扶歸已不能言矣相隨
止凡一人泣告太守曰吾主飲順德一口水耳積貸
未償今若此寥落行囊請封識以戒途知吾主之爲
清白吏也語畢引刀割股和藥以進顙天願代主死
少間慙稍蘇太守義之爲作傳

黃老人江寧庠生黃清家隸也清以文學名讀書寺中
挾老人與俱老人烹炊灑掃曲當主人意清遘疾不
起家徒壁立兩子弱不能庀終事老人辟踊悲號曰
此老僕之責也夙夜拮据周身周棺皆盡誠敬黃氏
貧不能育老人乃脫身外出爲傭每旬朔必謁主母

問安否所得傭值悉以供餽粥值春秋伏臘則買豚蹄斗酒走墓上哭奠盡哀或以他故不得往則遙望哭酹見者傷心清家有數畝未葬老人減削衣食踵告于清之親友醵錢懸封而旋葬焉傭于王生禹昉家勤慎一如事清病將革生慰之曰汝無憂吾將買棺以窆汝笑而謝曰無庸也一簣條足矣其達生又如此

增華瀨水劉氏僕也居恒朴野劉氏以常奴畜之崇禎癸酉劉仲子道開補崖州幕偕其弟及二客二僕往海邦多瘴病無何二客二僕相繼死道開懼遣其弟還而道開亦死獨增華濱死復生乃問關萬里扶柩歸跪主母前且拜且泣出百金封識宛然曰此主人積俸也襖被蕭然衣衾不掩旁觀歎服

廬墓者二十四人

南齊朱百年江寧人

值兵亂母死廬墓終身有白兔紫芝之異鄉人名其里曰孝感

唐張常洧句容人

父卒廬墓墓側生芝草十莖從孫公挺亦以孝稱

宋傅霖秣陵鎮人

旌

張孝友句容人

親歿廬墓三年有五色鳥來集墓樹

趙煥溧水人

廬墓不仕學者宗之

明彭鯤溧陽人

母卒廬墓有連理白兔之異

陳于震溧陽人與弟丹同廬墓

丁滌溧水人

傅袞溧水人

袁文化溧水人廬墓九載

楊振溧水庠生

陳宗堯高淳人新城令廬墓三年不御酒肉

周庖高淳人母病割股沒而廬墓

魏孝楞高淳人楞卒子亦廬墓勅旌父子雙孝

耶振羽高淳舉人戶部郎父母先後卒各廬墓三年

施龍高淳人親病割股歿而廬墓 魏臞高淳庠生廬墓終身

劉一俊高淳人廬墓三年 王海江浦人

胡深六合庠生 毛程六合人父歿廬墓

大清吳學萊高淳庠生 王三接高淳人

割股者六十五人

宋史思賢溧陽人割心療母 王弟兒溧陽人年十五割股愈母

丘念一溧陽人割股愈母 王德先溧陽人割股愈母

何百四溧陽人割股愈母 伊小乙溧水人割腹取肝

劉興祖溧水人割股療父疾愈復作又割肝以進旌

謝千九溧水人割股療父 陳某失名溧水人割股療母

鄭雲龍溧水人割股療母

元顧童子建康人年十六母病割股母愈而童子死

僕文質溧陽人十歲割股療母

明倪壽江寧人割左脇肉愈母旌

江元孫江寧人割股愈母旌

張繼宗上元人割股愈母旌

水軍衛黃阿回割股愈母旌

府軍右衛指揮汪應乾割股愈母數年母復病復割股以進而愈

姚金玉其先浙人隸上元洪武初割股愈母

徐佛保江陰衛人割肝愈母旌

馮添孫上元人割股愈母旌

張福緣郡人割股愈母旌

王項上元人割股愈母旌

吳淦上元人精醫卜割股愈母

李仕傑上元人侍母蔡氏茹素祈壽

庠生沈昇割股愈母

庠生陸元龍事繼母孝割

王萬禛上元人割股愈母

千戶劉潮子文縉割股愈

楊佐上元人童子

顧夢家尚書璘孫割股愈母

知縣路汝捷割股愈母

陳鑛上元庠生割股救母旌

戎憲句容人割股愈父

張一鵬句容人割股愈父

徐延雄句容人割股愈父

馬獻圖句容人割股愈父

吳方明句容人割股愈母

李長標句容人割臂肉救母

朱亞春溧陽人割股救母旌

史以辰溧陽人割股愈母旌又史亞慶

史繼夏溧陽人割股愈母

史阜溧陽人割股愈母

虞周溧水庠生割股愈母

狄褒溧陽人割股愈母

黃振溧水人割股愈母

虞欽溧水人割股愈母

史員八高淳人割股愈母

任超溧水人割股愈父

史員八高淳人割股愈母

陳希任高淳人

歲荒齋子以養
父病割股以療

湯之尹高淳人

四割股
救父

孔胤紀高淳人

九歲割
股愈父

葛至學高淳人

為父割股者再為母舐
目復明卒而廬墓旌

貢士周思臯江浦人

十五歲割
股愈母

楊鳳江浦人

割股救母壽
享一百一歲

方顯六合人

黃閻六合人

繼母有疾
燃臂顙天

王岳六合人

割股
救父

李夢周六合人

年七歲割
股愈父

毛至潔六合人

割股
救父

陳應登六合人

割股救父又
割臂救母

許忠六合庠生

割股
愈父

汪國涓六合庠生

割股
愈母

沈希孟六合庠生

割股
愈母

大清知府劉玉佩

江寧人割股救
父

王瑞昌溧陽人

割股
愈父

黃明詔溧水人

割股療父其子
世化割股療母

司良春江浦人

割股
愈父

論曰孝之為百行首也本仁祖義塞天地而橫四海
雖至愚不肖有不知愛其親者哉禮經言孝推之至
居處莊事君忠蒞官敬朋友信戰陣勇卽一舉足一
出口無敢忘父母焉遵斯道也何用不臧而况還金
赴難好善樂施之彰彰者乎世未有義士不從孝子
出者也若夫廬墓割股賢者之過古無聞焉聞之喪
事有進而無退仲尼曰古不修墓子貢曰速返而虞
以是知廬墓非古也記曰父母全而生之子全而歸
之明高帝著為令曰人子身體受之父母小人好奇

邀賞乃有割股刲心之事倘有不虞反傷親心自後凡有親疾務慎醫藥或情不得已亦聽爲之不在旌表之列大哉王言萬世不易然而末俗道喪民多薄於孝而厚于慈服勞奉養有不逮事妻子者矣爲人所難爲不猶愈于已乎故與其過而去之毋寧過而存之亦勵俗維風之一助也



